

पत्रुसए

उस०कताव ओसरो चिथी

आव चिथी येसुए उसिस पत्रुसए ओसरो ज़। नो चिथी परींद ओराएज्यावराए येसुए उमिनत दुख दैव ज़ यानैज्याव। है जैद पत्रुसए 'अजम्बरी जुनीए जेआस बनै थ०रिउ लिज़्या' लिद सम्जैद, यायुं सझें:द ओराएज्याव (१ पत्रुस १:३-१२; ५:१२)। परमेस्वरलाई यायुं हुपूज्यावर आव मानुवात खासिद यालिज़्यावए (१:१७; २:११) खीसए ओदैव मिताव दुखर नोराए मनी दैन्या लेर (४:१-१९)। निताव दुखर उहुदी ब परमेस्वरलाई यायुं हुबोर सरकारए ओकानुन धूँल सतस लिद परमेस्वरए ओक्याँत ख्यासिद लिन्या सरें:सिउ लिज़्या (२:११-३:१२)। माचाव येनत दुख दैज्याव देखा बुरू चाव येनत दुख दैन्या चाव लिज़्या (३:१७)।

1 डा पत्रुस, येसु खीसए ओसाचीए डाल्योनी, जे परमेस्वरनी छाँतिसिउर पोन्तस, गलातिया, कापादोकिया, एसिया सोनो बिथिनियाल चितराँ पुतराँ ताद खासिद लिज़्यावरालाई आव चिथी परींद डायचिज़्या। 2 परमेस्वर गेबाबुए जेलाई ओज़ा येसु खीसए ओपाँ भै:न्यार जैन्याए जूनी जेलाई डादाकिन ज़ थ०रैद, छैव उपुरूसए चोखोइद, ओज़ाए उझीए ब छरैचिक्यो।

जेलयोदा परमेस्वरए उयुं झन ज़ गराँद जेयुं होलाँ जैद ओयाचिउक।

अजम्बरी जुनीए आस

3 गेप्रभु येसु खीसए ओबाबु परमेस्वरए उमिन बनै ओघ्यो:क। गेल्योदा उयुं नाद सा:रो जुनील जर्मैसिक्यो। है जैद ओज़ा येसु खीसलाई सिउनी ओसोचोइवए गेलाई मनी अजम्बरी जुनील बान्या आस याद नैसिउ। 4 नो आस स्वर्गत नैसिउ जेजुँ ज़। नो जुँ चिन्या ब माले, खेमन्या ब माले, मान्या ब माले। 5 परमेस्वरए नो अजम्बरी जुनीलाव जेआस छीनीकाव बेलाक

सयोऽद्याचिरिज्याव। नो सयोऽद ओमायाचिवा पै जे नत जेयुं सुहुपद जेनेज्यावए जेलाई ओल ओसक्तीनी जोगोइद पाथस नैचिज्याव। 6 है जैद आज्यालकाव जाँवा पै जेदैज्याव दुखर जो मितावर याहुदी ब प्राइँ सहिद रेंव ज़ जेलिज्या। 7 किताव सुनलाई मेंःल खारिज्यार, हिताव ज़ आव जेदुखए ओअर्थ मनी 'जेयुँ साचो उहुपूज्याव सैं ओमाहुपूज्याव?' जाँचिन्याए जूँनी ची। जेयुँ हुबो ते खेमद बाज्याव सुनकिन ज़न ज़ ओएः ल्यो लिज्या। है जैद दुखर उहुक जेसहिधुकिन येसु ख्रीस ओसरेंःसिहुव बेलाक जेलाई थोरिउ, महिमानोर, जेगुन ल्योर दैहुन्या ले। 8 नोलाई डादाकिन जेमार्ःधुदी ब मया जेदोज्या। आज्याल जेमार्ःधुदी ब ओलयोदा जेयुँ हुपूज्या। सोनो जेरंतए ज़ोःवा ज़ोःवा जेताज्या, 9 काराव ल्यो ताकिन नो जेयुँ जेसुहुबोनी अजम्बरी जुनी जेदैरिज्या।

10-11 जेल्योदा इताव जुनी हरिज्या लिद अगमबत्ताराए नो असिकए जूँनी डादा ज़ सर्द नैर। ख्रीसए उपुरूसनी ओल ख्रीसए उजूँनी 'दुखर दैद उसिउत ज़गै मगैव तारिज्या' लिन्या डादा ज़ पाँद लेर। खाली नो पुरूसनी यादैव पाँए ओअर्थ माबुझिद, 'आव खा बेलाक, सु ओतारिज्याव?' लिद खिमो ज़ यानैज्याव। 12 छीनी नो पाँए ओअर्थ पाल्द होराए यापालाकावए जूँनी माःक, जे जेपालाकावए जूँनी ची ओलयो लिन्या थरैकेर। आज्याल नो पाँ ज़ जेलाई परमेस्वरए ओपाँ सथैज्यावराए स्वर्गतिन परीसिउ छैंव पुरूसए ओसक्तीनी सथैचिज्यार। नो पाँ परमेस्वरए ओचाकर्याराए मनी बनै थैन्या युँ यादोज्याव।

छैंवस लिन्या

13 है जैद जेतहस लिद, प्राइँत ज़ सैसिद झाःसिद लिचिके। येसु ख्रीस फरिकाव औरेंःहुक जेलाई यान्या असिकदा जेयुँ थू जैद नैचिके। 14 किताव लुज़ाराए है दासिउ याभैंःज्याव, हिताव ज़ जे

मनी परमेस्वरए ओपोर्रं भैःद, नो ड़ादाडाव ओपोर्रं मासैंदकाव जेयुं स्यासो फरी ताजैच्यो। 15 जेलाई खुलुज्याव छैव लिज्या। है जैद जे मनी हिताव ज़ प्राइँल छैवस लिचिके। 16 धर्मसास्त्रल मनी इताव सर्सिउ लिज्या,

“डा छैव ड़ालिज्या,

जे मनी हिताव ज़ लिच्यो।”

17 होए मिँ रँःद मादोव, येन रँःद वाज़ दोज्याव। नितावलाई ‘बाबु’ है जेदोज्याव ताकिन आव मानुवात खासिद जेलेवा भरी ओल्योदा जेयुं खोतोरो जैद छेःद लिच्यो। 18 जे ज़ जेसैज्या, ड़ादाडाव जेजिज्यु बाज्युकिनकाव जेदोहुज्याव अनाकलाव रितिथितीरानी खेम्द बान्या सुन चाँदीए फुर्सुल ओजैचिउ माःक। 19 कान्त ज़ ओखत माल्यो हाँस्या पाथा स्यासो लँःद मालँःसिधुन्या स्त्रीसए उझीए ज़ फुर्सुल ओजैचिउ ची। 20 नोलाई आव नाम नम ओमाजैद ड़ादाकिन ज़ उथैद ओनैज्याव। आव छीनीकाव बेलाक बल्ल जे जेजूनी ज़ सरैःद्याचिक्यो। 21 जे नोलाई रँःद परमेस्वरए ल्योदा जेयुं हुपुज्या। नोलाई ज़ परमेस्वरए सिउनी सोचोइद ज़गै मगैव जैक्यो। है जैद जेयुं जेआस परमेस्वरए ल्योदा ज़ लिज्या।

22 जे आव सतलाव पाँ भैःद, छैव ताद नै मेंलाई मया दान्या जेतावए, नो जेमया पक्कास जेयुं स्यानी ज़ ताव ओताक। 23 काराव ल्यो ताकिन जे साःरो जुनी दैद जेनै। नो जेदैव जुनी ते फ्याःन्या धुरनी जेदैव माःक, परमेस्वरए खर्क ज़ माफ्याःन्या एकतार रहिज्याव जीदो ओपोर्रंनी ज़ जेदैव ची। 24 धर्मसास्त्रल मनी इताव सर्सिउ लिज्या,

“मिँ भरी छी स्यासोर ज़,

यासोभा ल्योर ब वास स्यासोर ज़।

छीर ब थँज्यार,

वासर ब गलिज्ज्यार।

25प्रभुए ओपाँ ते खर्क ज़ मामाए, माखेमे।”

नो माखेम्न्या पाँ यासथैचिज्ज्याव चाव था ज़।

2

1है जैद मादान्या येन भरी रासो ताके — धुतैन्या, कप्तै दान्या, मी तून्या, छुलै पुलै दान्या — आव भरी रास्च्यो। 2 सा:रो जुनील पाखो तानान्याए जूनी भाउज़ाए नुई उखिम्ज्याव मिताव जे ब परमेस्वरए छैव ओपाँ ओअर्थ खिम्च्यो। 3 काराव ल्यो ताकिन जे गेप्रभुए उगुनर दार्द जेने।

परमेस्वरए ओराज्यालाव गजलाव लुँ

4गेप्रभु येसुए ल्योदा हुचिके, हो गजलाव जीदो लुँ ज़। नोलाई ज़न मिँराए ‘माचाहिए’ लिद ख्याकेर। खाली परमेस्वरए ते नोलाई छाँतिद बनै ओए: ल्यो थरैक्यो। 5 जे ब जीदो लुँ स्यासो जैसिद परमेस्वरनिकाव ताज्याव ज़िमत रीम्सिहुचिके। जे नल छैव पुजारीर ताद परमेस्वरए ओपैज्याव युँनिकाव पुजार येसु ख्रीसनी चरै:चिके। 6 धर्मसास्त्रल मनी इताव सर्सिउ लिज्या,
“चिऊचिके, सियोनलाव डाराज्याल छाँतिसिउ बनै ओए: ल्यो लुँ भुयारलाव गजल थाँद डानै।

नो लुँत यायुँ हुपज्यावर लाज मोर्नो तान्या मालेर।”

7जे नत जेयुँ हुपज्यावरलाई आव बनै ओए: ल्यो लुँ लिज्या। यायुँ माहुपज्यावरए जूनी ते इताव सर्सिउ लिज्या,
“भुलीराए कान्ल ज़ माज्यासे लिद याख्याव लुँ नो ज़ ज़न भुयारलाव लुँ ताके।”

8फरी तोथोल इताव ब लिज्या,

“नो ज़ मिँराए यायुँ के:द्यान्या सुतुम्न्या लुँ।”

नोर परमेस्वरए ओपाँ यामाभैःवए नो लुँत तुम्ज्ज्यार। नोरालाई परमेस्वरए निताव ज्ञ याजैक्यो। 9 जेलाई ते हिताव माःक। जे छाँतिसिउ ओथोर, राजाराए याराजाए ओसेवा दान्या पुजारीर, ओल उमिनताव छैँव जात, परमेस्वरए ओथामिचिउ उमीर ज्ञ। है जैद जे गेप्रभुए उगुनर प्राईँदा सथासून्याए जूनी जेलाई चुम चुमोनी पलेद अचम्बलाव ओज्जगैल झाःचिक्यो। 10 जे डादा कान्ल ज्ञ मागनिसिउर जेल्यो। आज्याल ते परमेस्वरए उमीर ताद जेले। डादाकिन यालो उयुँ मादैवर जेल्यो, आज्याल ते यालो उयुँ दैद जेने।

परमेस्वरए ओपाँ धूँल लिन्या

11 आव मानुवात खासिद लिज्याव डायुँलाव डानैँ डामेर, जेस डाबिन्ती लिज्या — जेयुँ जेमानैधुज्याव माचाहिउ येनरालाई वैँव ताके। नो पाँराए युँस लरैँ दोज्यार। 12 यायुँ माहुपूज्यावराए डाक चाव येन सतैँचिके। हो ताकिन ची सुवाराए जेमिन बलेद यायाचिदी ब परमेस्वर फरी उहुन्या छचाम जेयेन रँःद 'आवराए यायेन ते चाव ची ओल्यो' लिद परमेस्वरए उमिन ब सघ्योःन्या लेर।

13-14 राज्या चलैज्यावराए याथरैँव कानुन धूँल लिद 'प्रभुए उजूनी ज्ञ डादोज्या' लिद समजिच्यो। नोर राजा तादी ब, होए उधूँलावर तादी ब, यापाँ भैँःच्यो। नोरालाई, माचाव येन दाज्यावरालाई सजा यान्या, सोनो चाव येन दाज्यावरालाई स्याबास यान्या हक यासिउ लिज्या। 15 यायुँ माहुबोराए अनाकलाव माचाहिउ यापाँर चाव जेयेनए थाम थुम जैन्या परमेस्वरए उयुँ लिज्या। 16 जे फुर्सुल जेतावए हितावनी ज्ञ दोच्यो। खाली, 'सुए उधूँल ज्ञ गेमाले' लिद कोभादा बान्या माःक, बुरू परमेस्वरए उधूँल लिद ओयेन दोच्यो। 17 प्राईँए यामान नैद याराएच्यो। यायुँ हुबो नैँ मेरालाई

मया यारादोच्यो। परमेस्वरलाई रँद छेच्यो। राजाए ओमान ब नैदिच्यो।

यायुँ हुबो बाँदाराए यायेन

18 जो बाँदा जेलिज्या, जेसाहुराए यामान नैद्याद याधूँल लिचिके। यायुँ यालो सोनो चावरालाई वाज माःक, अखत्यासोरालाई ब यामान नैद याराएच्यो। 19 जे अनाकल ज मादैन्या दुखर जेदैक परमेस्वरलाई सम्जिद जेसहिकिन नो परमेस्वरए ओपैज्याव मिताव येन ज। 20 माचाव येनत सजा दैद जेसहिकिन नो काता ची ओतारिज्याव? चाव येनत दुखर दैद जेसहिकिन ते परमेस्वरए ल्योनी असिक जेदैरिज्या। 21 आव येनए जूनी ज परमेस्वरए जेलाई खुल्द नैचिउ। स्त्रीसए मनी जे जेजूनी दुखर सहिद्याचिक्यो। है जैद उसिलत बान्या येम सतैद नैसिउ लिज्या।

22 “होए माचाव येन खर्क ज मादोव,
धुत ब खर्क ज मापाँए।”

23 याथल्क ब फर्कैद मारायो। दुख याएक ब ‘रँद नैच्यो’ है मारादोव। बुरू, ‘जो तादी ब चावस फाल्न्या ओल परमेस्वर ज लिज्या’ लिद ओक्याँत ख्यासिद लिके। 24 गेलाई ‘पाप दान्यात सिधुव मिताव जैसिद परमेस्वरए उयुँलाव मिताव येन दान्या घतारक’ लिद क्रुसत तज्ञैसिद गेदोव पाप भरी ओल ज घुर्घासिक्यो। है जैद नोए ओघाइनी ज जे जेगराँके। 25 जे डादाकिन डोइव बेधा स्यासोर जेल्यो, अब ते पाथस नैज्याव जेर्गे गावलाए ओल्योदा ओल्द हुद जेले।

3

ज्या-रीलाव पाँर

1 जे रे दाव मेंमार, जेरैराए यापाँ धूँल लिच्यो। हो ताकिन ची परमेस्वरए ओपाँ माभैःज्याव जेरैर जे है जेमारादोदी ब चाव येन

जेदोज्यावए परमेस्वरए ल्योदा हुन्या लेर। ² छैव जेयेन सोनो परमेस्वरए ओमान नैद जेएज्याव रँ:द यायुँ परमेस्वरए ल्योदा जैव ब धुर। ³ जेक्याँ जेबनैसिक जेचेम परीद, सुन चाँदी जासिद, चाव चाव क्वा क्वाइसिद, पाखाताव सतैन्या वाज्र ताताक। ⁴ हो देखा बुरू जेयुँल बनैसिचिके। युँलाव खर्क ज़ मालिसिन्या सोभा आव ज़ — थकानस, तहस लिन्या। नोलाई ज़ परमेस्वरए चाव रँ:ज्याव। ⁵ परमेस्वरए ओक्याँत ख्यासिउ भा:डाव छैव मेंमाराए ब हिताव येन ज़ दोकेर। यारेराए यापाँ धूँल लिद यायुँल बनैसिकेर। ⁶ साराए मनी ओरे अब्राहामलाई 'प्रभु' लिद ओपाँ भरी भै:के। जे ब माछे:द साचो छैव येन जेदोकिन साराए ओज़ार ज़ तान्या जेले।

⁷जे ज्या दाव खेपाराए मनी, 'डाज्याए ओर्सा डार्सा स्यासो माले' लिद अखत्यासो माजैसिद लिच्यो। सोनो, 'आव सा:रो जुनी सिप ज़ गिनदैके' लिद ज्याए ओमान ब नैदिच्यो। जिन जिन्माखैकिन जिन्पोखारिज्याव परमेस्वरए ल्योड कातानी ओकेसरिज्याव?

⁸है डादाचिउ भरिए ओअर्थ आव ज़ — जे जेल खैद तोबो फूलाव मिताव जैसिद हुनी होदा सम्जैसिच्यो। मासघ्यो:सिद नै मेंए ल्योदा जेयुँ ब ओगराँक। ⁹ माचावलाई माचाव फकैद ताएच्यो। याथलचिदी ब जे ताराथलच्यो। बुरू असिक याराएच्यो। काराव ल्यो ताकिन आवए जूनी ज़ खुल्सिउर जेलिज्या। निताव जेदोकिन जे परमेस्वरए ल्योनिकाव असिक दैन्या जेले। ¹⁰ धर्मसास्त्रल ब इताव सर्सिउ लिज्या,

“जोए फाबिन्या चाव जुनी पैज्याव,
होए ओसेलाई माचाव पाँनी जोगोइद,
ओया:नी धुत पाँ तापलेवक।

¹¹बुरू माचावनी ओल्द चावदा बाद, प्राइँस खैन्या उखिमोक।

¹²काराव ल्यो ताकिन प्रभुए उमी धर्मी मिँराए याक्याँत वाज्र

लिज्जया।

ओर्ना ब यापोंस्वारिज्ज्यावदा घ्याँ जैद याएज्ज्याव।

माचाव येन दोज्ज्यावरालाई ते कुरनी याचिऊज्ज्याव।”

चाव येनत दुख सहिन्या

13 चाव येनत कलं जेलिकिन सुए ज्ञ मावैचिर। 14 खाली कैताराक चाव जेयेनत दुख जेदैकिन धन्याकावर जेताज्ज्या। जेखिरी पसिज्ज्यावर रँद ताछे-च्यो, हार तामानिच्यो। 15 बुरू ख्रीसलाई जेयुंलाव जेर्गे जैच्यो। सुवाराए नो आस दाद जेनेज्ज्यावए जूनी यासुधिचिकिन नोरालाई मास०द चावस पलासुद्यान्यात झाःसिद लिच्यो। 16 जो येन जेदोदी ब छैव युँस दोच्यो। हो ताकिन ची जेमिन बलेद यायाचिदी ब, ख्रीसनिकाव चाव जेयेनए लाज मोर्नो ताद थाम थुम तान्या लेर। 17 परमेस्वरए जेजुँ दुख दैन्या जैद ओयाचिकिन माचाव येनत दुख दैज्ज्याव देखा चाव येनत दैन्या चाव लिज्ज्या। 18 काराव ल्यो ताकिन ओल ख्रीसए ब जेलाई परमेस्वरस सखैन्याए जूनी जे अधर्मीराए जेपोल ओल धर्मी मिं थाँसिद जेपाप भरी तखेपूत ज्ञ ख्याद्याचिक्यो। उजिउ झाःद ब पुरूसनी सोके। 19 नो पुरूसनी ज्ञ नर्गल लिज्ज्यावरालाई मनी ओपाँ यासथैनाक्यो। 20 नो नर्गल लिज्ज्यावर भाःडाव नोआए ओपालाकिनकाव परमेस्वरए ओपाँ माभैःज्ज्यावर ज्ञ। नोआए नो री जहाज जैन्या ओमाखेमा पै ‘कसा यारुँ माफकैर’ लिद परमेस्वरए कींद ओरानैज्ज्याव। खाली नो रीनी जम्मा आथ जना वाज्ज बाँचिकेर। 21 नो रीनी बाँचिन्याए ओअर्थ रील सछैँसिन्या मिताव ज्ञ लिज्ज्या। नल मनी रीनी जेबाँचिज्ज्या। खाली हुर्सिद पाखाताव जेक्याँताव रीः जेख्यावनी ते माःक, परमेस्वरए ओडाक जेयुंलाई सछैँद परमेस्वरस याका जेनेज्ज्याव ची। येसु ख्रीस सिउनी

ओसैसिउनी जे ब जेबाँचिज्या। 22 ओल स्वर्गत बाद परमेस्वरए ओवोर्दा चुसिद ले। नल स्वर्गताव चाकर्यार, याहक ल्योर, यासक्ती ल्योर प्राई उधूँल ज़ लिज़्यार।

4

परमेस्वरए उयुँलाव येन दान्या

1 है जैद ख्रीसए मनी उजिउत दुखर उसहिउए जे मनी निताव येनत झाःसिद लिचिके। जोए दुखर दैद सहिज्याव, होए ज़ पाप दान्या ब रासज़्याव। 2 नोए ज़ आव मानुवात ओलेवा भरी युँ मानैधुन्या भरी रासद परमेस्वरए उयुँलाव मितावदा वाज़ उयुँ थू जैज्याव। 3 डादा जे मनी परमेस्वरलाई मासरेसज़्यावराए यादोज़्याव मिताव पातर्या पातर्नी जैसिन्या, जोत ब युँ मानैधुन्या, मँःए मँःए बारिन्या, तुबुरी दुलिन्या, मद छोकोरा वाज़ खेपैन्या सोनो युँ माजामो अङ्ग्या पुजा दान्यात कुधु समय जेझाःके। 4 अबकिन ते नो डादाकिनकाव जेनैरास जेजिउ च्यो च्यो जेझाःज्याव माचाव येनदा जेमाबाज़्यावए, नोर अचम्ब ताद जेलाई गिल्लैन्या लेर। 5 हैदी ब तछा सिउ मासिउराए यान्याय फाल्ज्यावए ओडाक च्याँःसिद नोर पाँव परिरिज्या। 6 है जैद सिउरालाई मनी चाव था सथैसिउ लिज़्या। हो ताकिन ची नोर प्राई मिँराए माँःती यासिदी ब परमेस्वरए उपुरुसनी एकमन्याकावए जूँनी बाँचिन्या लेर।

खेमन्या बेलाकाव येनर

7 खेमन्या बेला नजिकक ज़ हुद ले। है जैद जेतहस लिद पोखारिन्यात झाःसिद लिचिके। 8 प्राइरानी दान्या जे जेल युँ जीनी मया दासिन्या ज़। मयानी कुधु पापर कप्सिज्या। 9 जेझिमक हुज्यावरालाई मारूमरूमैद चावस यारासुमच्यो। 10 किताव प्राइँए तोबो तोबो भाँती भाँतिलाव परमेस्वरए ओबरदानर दैद जेनै, हिताव ज़ नो बरदानर चावस चलैद जे जेल समारिसिच्यो।

11 पाँजूयावए परमेस्वरए ओपाँनी ज़ ओपाँक। सघैजूयावए परमेस्वरए ओसक्तीनी ज़ ओसघैवक। हो ताकिन ची जेदोव भरित येसु ख्रीसनी परमेस्वरए उमिन रेंःन्या ले। नोलाई खर्क ज़ माखेमून्या ज़गै मगै सोनो सक्ती उकुइत ज़ ओताक। आमन।

ख्रीसए उमिनत दुख सहिन्या

12अ डायुँलाव डानैं डामेरं, जेखाल हुद लिजूयाव दुखर रेंःद 'काता इताव' लिद जेयुँर स्यासे तासतेच्यो। 13 बुरू नो दुखर जेदैक रेंद लिच्यो। काराव ल्यो ताकिन जे ख्रीसस सिप दुख जेदैजूयाव मिताव ज़ लिजूया। तछा ज़गै मगैवस उहुक जेयुँर होलाँ ताद रेंन्या जेले। 14 ख्रीसए उमिनत हेला यारेंःचिकिन धन्याकावर जेताजूया। ननी ज़ परमेस्वरए ज़गै मगैव उपुरूस जेक्याँत चुसिहुजूया। 15 खाली जेनी मिँ सैःन्या, कुन्या, छुतए ओयेनत कुइ झाःन्या, निताव माचाव येनरानी सुलाई ज़ सजा ताताक। 16 ख्रीस्त्यान जेतावनी ते दुखर जेदैकिन जेलाज ताहुक। बुरू नो मिन जेदैवनी परमेस्वरलाई धन्याबाद चरैःच्यो।

17परमेस्वरए जाँचिन्या बेला हुद ले। उसकत ओल उमीराए ल्योनी थूसिरिजूया। गेनी उथूसिकिन चाव ओथा माभैःजूयावरालाई झन किताव ताके? 18 धर्मसासुत्रल मनी इताव सर्सिउ लिजूया, “नो बेलाक धर्मीर धो धो याबाँचिकिन, पापीर सोनो अधर्मीर कातानी याबाँचिरिजूयाव?”

19है जैद परमेस्वरए ओयाचिउ जेजुँ दुखर दैन्या ताकिन, नो चाव जेयेनलाई मारासुद जेलाई जैजूयावए ओक्याँत ख्यासिद लिच्यो। होए जेलाई खर्क ज़ रासून्या माले।

5

परमेस्वरए ओबगाललाव पाँ

1जे मन्दलीलाव सेरर, डा मनी जेसकाव सेर मिताव जैसिद

डापाँजूया। ख्रीसए ओदैव दुखर आव डामीए ज़ डारँःके। डा मनी छींनी ओसतैरिजूयाव ओज़गै मगै जेस सिप ज़ डादैरिजूया। है जैद डा जेलाई है डादाचिजूया, ² जेपासल लिजूयाव परमेस्वरए ओबगाललावरलाई पाथस यारानैच्यो। सुवाराए करकापनी माःक, परमेस्वरए ओपैजूयाव मिताव जेयुँ स्यानी ज़ दोच्यो। धनए लोभनी ब माःक, सेवा दान्या युँस दोच्यो। ³ जेधूँलावराए याडैत अखत्यासो ब ताजैसिच्यो। बुरू बगालए ओड़ाक चाव येनत सतैद नैसिउ मिताव ताच्यो। ⁴ हो ताकिन ची जेर्गे गावला फरी ओसरैःसिहुक जेलाई घ्योःव मान याद एकमन्या ज़ तह महौ नैचिरिजूयाव।

⁵जे धापाज़ाकावर, सेरोराए यापाँ धूँल लिच्यो।* स्रोतो जे प्राइँ मासंद सज़िमसिद जे जेल चिऊसिचिके। काराव ल्यो ताकिन धर्मसास्त्रल मनी इताव सर्सिउ लिजूया, “संद सघ्योःसिजूयावरानी परमेस्वर तँदा ज़ लिजूया, सज़िमसिजूयावराए ल्योदा ते उयुँ यालजूया।”

⁶है जैद परमेस्वरए उधूँल लिद मासंद जेसज़िमसिकिन तछा सघ्योःचिरिजूयाव। ⁷ व्रीनी फुइ मालिद, परमेस्वरए ओक्याँत ख्यासिद लिचिके। होए ज़ जेलाई चिऊचिजूयाव।

⁸जेतहस लिद सैसिद लिच्यो। जेसुतुर सैतान गर्जिजूयाव ला माँःती ‘सुलाई डाकैके’ लिद पेमे पेमे खिमचिजूयाव। ⁹ जे परमेस्वरए ओपाँत जेयुँ सुहुपद जेसा ल्यो ताद सैतानए ओड़ाक थाँसिचिके। ‘गोलाई वाज़ माःक, संसार भरिलाव गेदाज्यु भाइराए मनी आव दुखर दैव ज़ नैजूयार’ लिद याका दोच्यो। ¹⁰ जे जाँवा पै आव दुखर जेसहिउत नो दुखरानी प्राइँल गराँव गोव परमेस्वरए जेलाई जेयुँर होलाँ जैद्याद, जेसार हाइद्याद, ग्याल गिल माताद थोरिउर

* 5:5 5:5 छुत बुञ्जिन्या – मन्दलीलाव लोम्बाराए यापाँ धूँल लिच्यो। 5:5 5:5 हितो ३:३४

जैचिरिज्ञयाव। होए ज़ जेलाई ख्रीससकाव खर्क ज़ माखेमून्या ओज़गै मगैवल सिप ज़ लिन्या खुल्द नैचिउ। ¹¹ होलाई खर्क ज़ माखेमून्या राज्या उकुइत ओताक। आमेन।

तुपैन्या पार

¹²परमेस्वरए ओपाँताव उयुँ हुबो गेभाइ सिलासए उकुइत आव तूइँज़ा चिथी सर्द परींद डानै। आव चिथील 'परमेस्वरए उयुँ गेल्योदा इताव ज़ लिज्ञया' लिद जेयुँ सङ्गें:द्याद सर्द डानै। नत ज़ जेयुँ थऱैद लिच्यो। ¹³ बेबिलोनल लिज्ञयाव जेस सिप छाँतिसिउ परमेस्वरए उमिनतावराए याल्योनी जेरो है दाचिज्ञयार। डाज़ा मिताव मर्कूसए मनी जेरो है दाचिज्ञयाव। ¹⁴ जे जेल मयासा जेरो दासिच्यो।

ख्रीसए उमिनत लिज्ञयाव भरिरालाई जेयुँ होलाँ ओताक।

† 5:14 5:14 रोम १६:१६ चिऊन्या।

सा:रो बाचा

Kham, Western Parbate: सा:रो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd